

新元史

列傳

第七十五至第八十

冊陸拾肆第

列傳第七十五

新元史卷之一百七十八

賜進士出身日講起居注官翰林院侍讀國史館纂修膠州柯劭忞撰

伯帖木兒

玉哇失

哈答孫

塔海

乞台

哈贊赤

答答呵兒

答失蠻

曷

刺

不花

明安

忽林失

徹里

伯帖木兒欽察人至元中充哈刺赤入備宿衛以忠謹授武節將軍僉左衛親軍都指揮使司事二十四年從御史大夫玉昔帖木兒征乃顏敗賊於忽爾阿刺河追

至海刺兒河又敗之乃顏將金剛奴別不台率衆走山前追戰於札刺馬篤河至夢哥山賊復敗金剛奴遁二十五年夏成宗率諸軍討叛王火魯火孫是時哈丹禿魯干駐兀魯灰河伯帖木兒從玉昔帖木兒至貴列兒河哈丹來拒伯帖木兒戰卻之獲其將駙馬阿刺渾成宗說以賊將兀忽兒妻賜之至霸郎兒與忽都禿魯干戰生獲忽都九月玉昔帖木兒使伯帖木兒至納兀河東招集逆黨乞答直一千戶女眞押兒撒及達達百姓五百戶是年冬又從諸王乃蠻台討哈丹於斡麻站兀刺阿連敗其將阿禿八刺哈赤轉戰至帖麥哈必兒哈

又敗之進至明倫安城哈丹遁追敗賊於忽蘭葉兒一
日三戰至帖里揭挺身陷陣中三十餘矢而還是役也
王師失利伯帖木兒創甚玉昔帖木兒親視其創罪諸
將之不救者二十六年春正月師還復遣戍也眞大王
分地五月海都謀內犯勅伯帖木兒以其軍來會行至
怯呂連河值拜要叛伯帖木兒卽移兵討之獲其將伯
顏帝深加獎諭賜以所得伯顏女茶倫是年冬立東路
蒙古軍上萬戶府統欽察乃蠻捏古思那牙勤等四千
餘戶擢懷遠大將軍上萬戶佩三珠虎符二十七年哈
丹入高麗伯帖木兒偕徹里帖木兒進討二十八年正

月至鴨綠江與哈丹子老的戰失利伯帖木兒以聞帝命乃蠻台薛徹干等援之仍命伯帖木兒爲先鋒薛徹干軍先至禪春州擊敗哈丹踰數日乃蠻台以兵至合攻哈丹又敗之伯帖木兒將百騎追哈丹虜其妻孥哈丹尙有八騎伯帖木兒餘三騎再戰兩騎士皆重傷不能進伯帖木兒單騎追之至一大山日暮哈丹遂遁去乃蠻台嘉其勇賞以老的妻完者事聞賜金帶衣服鞍馬弓矢銀器皿并厚賚其軍二十九年叛王捏怯兒烈在濠來倉伯帖木兒以輕騎襲之虜其妻子畜產追至陳河捏怯兒烈以二十餘騎脫走得所管女直戶五百

餘以聞帝命充漁戶伯帖木兒度地置馬站七令歲捕魚以進成宗卽位幸上都徵其兵千人從歲以爲常皇慶元年加榮祿大夫延祐三年拜中書平章政事天歷二年知樞院事至順二年出爲遼東行省左丞相卒後至元四年賜宣忠濟美協誠經正功臣太傅開府儀同三司上柱國追封文安王謚忠憲

玉哇失阿速人父也烈拔都兒從其國王來歸充宿衛從憲宗征蜀爲游兵前行至重慶戰數有功嘗出獵遇虎於隘下馬搏虎虎張吻噬之以手探虎口抉其舌拔佩刀刺殺之帝壯其勇賞黃金五十兩別立阿速一軍

使領之從世祖征阿里不哥又從親王哈必失征李璮
俱有功賜金符授本軍千戶從克襄陽又從下沿江諸
郡宋將洪福僞請降誘其入城宴飲乘醉殺之長子也
速歹兒代領其軍從攻揚州中流矢卒玉哇失襲父職
爲阿速軍千戶從丞相伯顏平宋賜巢縣二千五十二
戶只兒瓦歹叛率所部兵擊之懷魯哈都擒其將失刺
察兒斬之又從丞相伯顏討判王昔里吉等進至斡耳
罕河無舟躍馬亂流而渡俘獲甚眾時北平王爲昔里
吉等所刦執勢張甚玉哇失力戰卻之追至金山而返
賜銀鈔改賜金虎符進定遠大將軍前衛親軍都指揮

使乃顏叛世祖親征玉哇失爲前鋒乃顏遣哈丹領兵萬人來拒擊敗之追至不里古都伯塔哈乃顏兵號十萬玉哇失先登力戰又敗之追至失列門林遂擒乃顏賜金帶只孫錢幣有差乃顏將塔不歹金剛奴聚兵滅捏該從大軍討平之旣而哈丹復叛於曲連江追敗其軍哈丹渡江遁又與海都將八憐人帖里哥歹必里察等戰於亦必兒失必兒皆有功成宗出鎮金山玉哇失率所部從之又從皇子闊闊出丞相朵兒朵懷擊海都軍突陣而入大敗之復從諸王藥木忽兒丞相朵兒朵懷敗海都將於八憐海都以禿苦馬領精兵三萬人趨

撒刺思河欲據險以襲我師玉哇失率善射者三百人
守其隘全軍而歸賜鈔萬五千緡金織綬三十匹武宗
鎮北邊海都復入寇至兀兒朵玉哇失敗之獲其駝馬
器仗以獻時海都圍札魯花赤孛羅帖木兒於小谷武
宗命玉哇失援出之謂諸將曰今日大丈夫之事舍玉
哇失誰能之縱以黃金包其身猶未足以厭吾志也武
宗南還命玉哇失殿後因留之戍邊賜金察刺二玉束
帶渾金段各一仍賜秫米七十石使爲酒以犒其軍後
海都子察八兒遣人詣闕請和朝廷許之撤邊備玉哇
失乃還帝錄其功賜鈔五萬貫進鎮國上將軍仍舊職

大德十年五月卒子亦乞里歹襲亦乞里歹卒子拜住
襲

哈答孫本闢中人其父刺真從憲宗至和林遂家焉哈
答孫年十五侍世祖於潛邸以謹篤稱中統初命掌尙
食局久之遷生料庫提點至元二十四年從討乃顏有
功加武略將軍從幸杭海值歲饑哈答孫請於帝賑之
不足濟以私財全活甚衆大德元年擢懷遠大將軍淮
東淮西屯田捕打總管武宗卽位拜淮東淮西道宣慰
使至大四年賊起四明賜三珠虎符授中書右丞浙東
道宣慰使兼都元帥往討之哈答孫驅賊入海安集流

亡境內帖然俄感瘴癘卒年六十五延祐初贈推忠效
義佐理功臣太傅開府儀同三司上柱國追封秦國公

謚昭宣子塔海

塔海方數歲世祖一見奇之命肄業國子監成宗卽位
授樞密院斷事官大德末輔立武宗轉同僉樞密院事
擢樞密副使尋遷大司農同知宣徽院事仁宗在東宮
或建議立黑軍衛率府塔海力諫仁宗嘉納之及卽位
遷集賢大學士太醫宣徽院使進翰林學士承旨知制
誥兼修國史卒

乞台察台氏世祖時爲欽察衛百戶從土土哈征失烈

吉及乃顏有功賜金符擢千戶從征忽刺出戰於阿里
台之地元貞二年卒子哈贊赤初從土土哈征哈丹罕
戰於貴烈兒有功大德五年從征杭愛又從武宗討哈
刺阿答又從牀兀兒征不別八憐爲前鋒以功受賞皇
慶二年賜金符爲千戶延祐四年從周王舉兵與諸王
禿滿帖木兒戰於失刺答兒馬不勝王北奔金山哈贊
赤從王居其地十有三年天歷二年周王卽位賜金符
授昭勇大將軍同知大都督府事卒

答答呵兒脫脫忒氏父孛兒速世祖時直宿衛扈駕征
哈刺章還世祖駐蹕高阜見河北有乘船至者顧謂左

右曰此賊也奈何孛兒速解衣徑渡揮戈刺殺舵手二人拏其船近岸賊悉就擒以功受賞答答呵兒襲父職從征孛可有功進武德將軍揭只揭烈溫千戶所達魯花赤從征乃顏也不干等擒也不干收其所管欽察戶武宗時進懷遠大將軍都元帥卒

答失蠻哈刺魯氏曾祖馬馬太祖六年從其部長阿爾思蘭來朝於龍居河馬馬子阿里前卒以其孫哈只爲質子哈只後事太宗爲寶兒赤以恭謹爲太宗所信任從世祖取雲南伐宋俱有功以疾卒答失蠻襲父職爲寶兒赤世祖甚重之是時阿合馬秉政答失蠻侍左右

因極論其姦帝怒而呵之曰無預汝事答失蠻徐對曰
犬馬知報其主臣世荷國恩豈敢知而不言其後阿合
馬敗帝思其直賜玉環及鈔二千五百貫諭以後有所
知仍盡言無隱二十四年從討乃顏有功以蒙古女脫
脫倫氏妻之帝幸杭海使答失蠻督餽餉晉王軍乏食
以便宜輸米給之師還自劾專擅帝嘉歎不已賜銀鈔
有差三十七年復立尙書省答失蠻上疏切諫言尤劖
切及桑哥伏誅其言悉驗詔賜宅一區固辭仍賜玉環
及只孫服以旌之成宗卽位以奉議大夫領供膳司事
車駕親征海都勅倍道兼行答失蠻慮後軍不繼請俟

大眾集而後進帝避之尋擢司農丞進職爲卿與其子
買奴侍帝疾數月衣不解帶成宗崩答失蠻迎武宗於
野馬川仁宗爲皇太子以答失蠻先朝舊臣奏爲中書
參知政事仍兼司農卿賜金犀帶七寶笠珠帽珠衣金
五百兩田二千畝仁宗卽位命僉宣徽院事同列以出
納不謹陷於贓汙答失蠻獨不與其事累遷宣徽院使
階榮祿大夫嘗侍坐侑食帝問先朝舊事答失蠻奏對
稱旨賜玉帶海東白鶲且命畫工繪像於內廷延祐四
年卒年六十臨卒告其諸子曰人之隕其世業者必自
貪與侈始汝曹戒之贈推誠宣力守正功臣太保金紫

光祿大夫上柱國追封定國公謚忠亮子買奴河南行
省中書平章政事以翰林學士承旨榮祿大夫致仕忻
都上都留守兼本路都總管府達魯花赤怯來同知宣
徽院事

曷刺兀速兒吉氏至元九年世祖召見命入直宿衛從
討乃顏賜金幣甲冑橐駝鞍馬成宗卽位命曷刺使高
麗和林江西福建皆稱旨授忠勇校尉中書直省舍人
出爲息州達魯花赤晉奉訓大夫武宗卽位詔曰曷刺
世祖舊臣可授奉議大夫都水監明年晉嘉議大夫金
虎符兼直東水韃靼女直萬戶府達魯花赤延祐元年

特授資善大夫遼陽等處行中書省左丞仍監其軍三年詔爲榮祿大夫大司農卒年六十三贈推誠宣力保德功臣太師儀同三司上柱國追封薊國公謚安穆子不花

不花宿衛仁宗潛邸及卽位授中順大夫中書直省舍人改直省副使遷大中大夫同知典瑞院改左司員外郎參議中書省事延祐二年六月拜中奉大夫中書參知政事十二月罷爲資德大夫宣徽副使同知宣徽院事改典瑞院使兼襲其父監軍佩金虎符又改翰林學士至治元年仍翰林學士監軍領東蕃諸部軍事後爲